

四庫全書

集部

欽定四庫全書

御定佩文齋詠物詩選卷四十八

除夕類

五言古

餽歲

宋  
蘇軾

農功各已收歲事得相佐為歡恐無具假物不論貨山  
川隨出產貧富稱小大真盤巨鯉橫發籠雙兔卧富人  
事華靡綵繡光翻座貧者媿不能微贄出春磨官居故

人少里巷佳節過亦欲舉鄉風獨倡無人和

五言律

守歲

唐太宗

暮景斜芳殿年華麗綺宮  
寒辭去冬雪暖帶入春風  
階馥舒梅素盤花卷燭紅  
共歡新故歲迎送一宵中

除夜

太宗

歲陰窮暮紀獻節啟新芳  
冬盡今宵促年開明日長  
冰消鏡水梅散入風香  
對此歡終宴傾壺待曙光

西京守歲

唐 駱賓王

閒居寡言宴獨坐倦風塵忽見嚴冬盡方知列宿春夜  
將寒色去年共曉光新耿耿他鄉夕無由展舊親

除夜有懷

唐 杜審言

故節當歌守新年把燭迎冬氛戀虬箭春色候雞鳴興  
盡聞壺覆宵闌見斗橫還將萬億壽更謁九重城

歲除夜會樂城張少府宅

唐 孟浩然

疇昔通家好相知無間然續明催畫燭守歲接長筵舊

曲梅花唱新正柏酒傳客行隨處樂不見度年年

杜位宅守歲

唐 杜甫

守歲阿戎家椒盤已頌花  
盞簪喧櫪馬列炬散林鴟  
四十明朝過飛騰暮景斜  
誰能更拘束爛醉是生涯

除夜

唐 王諲

今歲今宵盡明年明日催  
寒隨一夜去春逐五更來  
氣色空中改容顏暗裏迴  
風光人不覺已入後園梅

除夜樂城逢孟浩然

唐 張子容

遠客襄陽郡來過海岸家樽開柏葉酒燈發九枝花妙  
曲逢盧女高才得孟嘉東山行樂意非是競繁華

除夜

唐  
曹松

舊曆不足卷東風還漸聞一宵有幾刻兩歲欲平分臘  
盡傾時斗春通綻處雲明朝遥捧酒先合祝吾君

歲除對王秀才

唐  
韋莊

我惜今宵促君愁玉漏頻豈知新歲酒猶作異鄉身雪  
向寅前凍花從子後春到明追此會俱是隔年人

除夜寄羅評事同年

宋 王禹偁

歲暮洞庭山知君思浩然年侵曉色盡人枕夜濤眠移  
棹風搖浪開窗雪滿天無因一乘興同醉太湖船

壬寅除夕

宋 戴復古

今夕知何夕滿堂燈燭光杜陵分歲了賈島祭詩忙橫  
笛梅花老傳杯柏葉香明朝賀元日政恐兩相妨

除夕

元 張希尹

歷盡年俱往寒多火未銷為憐無去日翻恨有來朝世

路看何隘家山望更遙  
雙娥燈影裡剪綵待元宵

七言律

守歲侍宴應制

唐  
杜審言

季冬除夜接新年  
帝子王孫捧御筵  
宮闕星河低拂樹  
殿庭燈燭上熏天  
彈絃奏節梅風入  
對局探鉤柏酒傳  
欲向正元歌萬壽  
暫留歡賞寄春前

江外除夜

唐  
曹松

千門庭燎照樓臺  
總為年光急急催  
半夜臘因風捲去



五更春被角吹來寧無好鳥思花發應有游魚待凍開  
不是多岐漸平穩誰能呼酒祝昭回

除夜寄舍弟

宋 王安石

一樽聊有天涯憶百感翻然醉裡眠酒醒燈前猶是客  
夢回江北已經年佳時流落真何得勝事蹉跎只可憐  
惟有到家寒食在春風同泛潁谿船

除夜野宿常州城外

宋 蘇軾

南來三見歲云徂直恐終身走道塗老去怕看新曆日

退歸擬學舊桃符煙花已作春風意霜雪偏尋病客鬚  
但把窮愁博長健不辭最後飲屠蘇

除夜

金元好問

一燈明暗夜如何夢寐衡門在澗阿物外煙霞玉華遠  
花時車馬洛陽多折腰真有陶潛興叩角空傳甯戚歌  
三十七年今日過可憐出處兩蹉跎

次韻癸卯除夕

元顧瑛

仰觀北斗轉遙天春在寒爐爆竹邊夜列粉盤循舊俗

曉看羅帕賀新年  
燒餘葦蔭生當路  
雪後梅花開滿煙  
不用鞭灰覓如願  
客囊賸有酒家錢

除夕

明程嘉燧

來往扁舟歲聿除  
流年風雨一蕭疎  
衆山未去殘縑在  
四壁雖存丈室虛  
短氣生涯新鬢硯  
顏歸路老傭書  
祇餘雪後營叢好  
巢燕相將識舊居

五言絕句

於太原召侍臣賜宴守歲

唐太宗

四時運灰琯一夕變冬春送寒餘雪盡迎歲早梅新

守歲

唐張說

故歲今宵盡新年明日來愁心隨斗柄東北望春回

嶺外守歲

唐李福業

冬去更籌盡春愁斗柄回寒暄一夜隔容鬢兩年催

七言絕句

除夜作

唐高適

旅館寒燈獨不眠客心何事轉淒然故鄉今夜思千里

霜鬢明朝又一年

和子由除夜元日省宿致齋

宋蘇軾

江湖流落豈關天  
禁省相望亦偶然  
等是新年未相見  
此身應坐不歸田

其二

白髮蒼顏五十三  
家人遙遣試春衫  
朝回兩袖天香滿  
頭上銀幡笑阿咸

其三

當年踏月走東風  
坐看春闌鎖醉翁  
白髮門生幾人在  
却將新句調兒童

除夕絕句

宋 楊萬里

紫陌相逢誰不客  
青燈作伴未為孤  
何須家裡作時節  
只問旗亭有酒無

除夕前一日

楊萬里

雪留遠嶺半尖白  
雲漏斜陽一線黃  
天肯放晴差易得  
殷勤賸覓幾朝霜

池州郡齋除夜寄呈家君

元貢奎

郡齋寥落夜無眠  
紙帳青燈思悄然  
不是今生惜今夕  
却緣明日是明年

除夕

明程嘉燧

久客懷人百事慵  
春歸幾日是殘冬  
長安雪後無來往  
報國門前獨看松

御定佩文齋詠物詩選卷四十八

欽定四庫全書

御定佩文齋詠物詩選卷四十九

山總類

五言古

山中雜詩

梁 吳 均

山際見來烟竹中  
窺落日鳥向簷上飛  
雲從窗裏出

初入山作

梁 桓 法 閭

寒谷夜將晨  
置賞復尋真  
方壇垂密葉  
澈水渡朱鱗  
杏



林雖伏獸芝田詎俟人丹成方轉石鑪變欲銷銀當知  
勝地遠於此絕囂塵

詠山

陳  
僧惠標

丹霞拂層閣碧水泛蓬萊  
龕岫含烟聳蓮崖照日開  
松門夾細葉石磴染新苔  
能令平子見淹留未肯回

從駕遊山

北齊  
袁爽

天遊響仙蹕春望動神衷  
澗水含初溜山花發早叢  
玉輿明淑景珠旗轉瑞風  
平原與上路佳氣遠蔥蔥

和宇文內史春日遊山

北周 庾信

遊客值春輝，金鞍上翠微。  
風逆花迎面，山深雲濕衣。  
雁持一足倚，猿將兩臂飛。  
戍樓侵嶺路，山邨落獵圍。  
道士封君達，仙人丁令威。  
煮丹於此地，居然未肯歸。

遊山

庾信

聊登玄圃殿，更上增城山。  
不知高幾里，低頭看世間。  
唱歌雲欲聚，彈琴鶴欲舞。  
澗底百重花，山根一片雨。  
婉婉藤倒垂，亭亭松直豎。

咏山

隋 劉 斌

靈山峙千仞蔽日且嵯峨紫蓋雲陰遠香爐烟氣多石  
梁高鳥路瀑水近天河欲知聞道里別自有仙歌

賦得巖穴無結構

隋 王 由 禮

巖間無結構各處極幽尋葉落秋巢迴雲生石路深早  
梅香野迳清澗響丘琴獨有栖遲客留連芳杜心

落日憶山中

唐 李 白

雨後烟景綠晴天散餘霞東風隨春歸發我枝上花花

落時欲暮見此令人嗟願遊名山去學道飛丹砂

秋山夕興

唐陶翰

山月松篠下月明山景鮮聊為高秋酌復此清夜絃晤語方獲志栖心亦彌年尚言興未逸更理逍遙篇

奉和夏日遊山應制

唐蔡文恭

首夏林壑清薄暮烟霞上連巖聳百仞絕澗臨千丈照灼晚花鮮潺湲夕流響悠然動睿思息駕尋真賞揆彼渦川作懷茲洛濱想竊吹等齊竽何用承恩獎

送丘員外還山

唐韋應物

長棲白雲表暫訪高齋宿還辭郡邑喧歸泛松江淥結  
茅隱蒼嶺伐薪響深谷同是山中人不知往來躅靈芝  
非庭草遼鶴匪池鶩終當署里門一表高陽族

出山吟

唐白居易

朝詠遊仙詩暮歌採薇曲卧雲坐白石山中十五宿行  
隨出洞水迴別緣巖竹早晚重來遊心期瑤草綠

山中作

唐馮用之

草堂在巖下卜居聊自適桂氣滿堦庭松陰生枕席遠  
瞻惟鳥度旁信無人跡靄靄雲生峰潺潺水流石頗尋  
黃卷理庶就丹砂益此即契吾生何為苦塵役

秋日過屏山菴

宋戴曷

淒切抱葉蟬間關棲樹禽入山本避喧復愛聆此音微  
颺動夕爽薄雲散秋陰衆籟闕以靜片月生東林

山中

明樊阜

夕景延淡陰微曛射林屋無營見道真塵紛悟蕉鹿此

意幾人知沈吟俯脩竹

其二

西風吹雨收竹屋雲陰散酒醒心亦清忘言玩文象老  
鶴劃然鳴月上青山半

暮歸山中

明 藍 智

暮歸山已昏濯足月在澗衡門棲鵲定暗樹流螢亂妻  
孥候我至明燈共蔬飯佇立松桂涼疎星隔河漢

送徐巢友還山

明 葛一龍

吾廬在空山戶牖白雲滿有樹常設設餘花亦纂纂城  
市不可居晝夜一何短買藥挂驢背行歌去人遠日落  
深澗中洗足春泥暖

尋山

明  
僧大香

負鉢尋遠山脩眉掛秋雨隔林清磬寂烟際疎蛩語古  
路沒黃蒿涼風自許許

七言古

山中新晴

宋  
文同



山中新晴曉烟暖散帶顏冠漱巖畔海鹽未去猿鶴喜  
柴桑初歸松菊亂林間餘雨時一滴嶺上飛雲忽雙斷  
安能舉手恣扶搖欲共高鴻拂霄漢

五言律

歲初歸舊居酬皇甫侍御見寄

唐  
錢起

欲知愚谷好久別與春還鶯暖初歸樹雲晴却戀山石  
田耕種少野客性情閒求仲應難見殘陽且掩關

山中春夜

唐張籍

寂寞春山靜幽人歸卧遲橫琴當月下壓酒及花時冷  
露濕茅屋暗泉衝竹籬西風採藥伴此夕恨無期

送友人歸山

張籍

出山成白首重去結茅廬移石脩廢井掃龕盛舊書聞  
田留杏樹分洞與僧居長在幽峰裏樵人見亦疎

山行

唐戴叔倫

山行分曙色一路見人稀野鳥啼還歇林花墮不飛雲

迷棲鶴寺水澀釣魚磯回首天將暝逢僧話未歸

早發故山

唐馬戴

雲山夾峭石路陰長松谷響猿相應山深水復重餐霞人不見採藥客猶逢獨宿靈潭側時聞岳頂鐘

山行

馬戴

緣危路忽窮投宿值樵翁鳥下山含暝蟬鳴露滴空石門斜月入雲竇暗泉通寂寞生幽思心疑舊隱同

山行

唐殷遙

寂歷青山曉山行趣不稀  
野花成子落江燕引雛飛  
暗草薰苔徑晴拂石磯  
俗人猶語此余亦轉忘歸

春山夜月

唐于良史

春山多勝事賞翫夜忘歸  
掬水月在手弄花香滿衣  
興來無遠近欲去惜芳菲  
南望鳴鐘處樓臺深翠微

秋月山中

唐姚合

秋來長早起拄杖繞階行  
風冷衣裳脆天寒筆硯清  
臨書愛奇跡避酒怕狂名  
不擬隨麋鹿山中過一生

山中

唐曹松

此地似商嶺雲霞空往還  
疎條難定鳥缺月易依山  
野色耕不盡谿客釣自閒  
分因多卧退百計少相關

山中

唐方干

散拙亦自遂粗將猿鳥同  
飛泉高瀉月獨樹迴含風  
果落盤盂上雲生篋笥中  
未甘明聖日終作釣魚翁

秋夜山中述事

唐薛能

初宵門未掩獨坐對霜空  
極目故鄉月滿谿寒草風  
樵

聲當嶺上僧語在雲中正恨歸期晚蕭蕭聞塞鴻

山中冬夜

唐張喬

寒葉風搖盡空林鳥宿稀澗水妨鹿飲山雪阻僧歸夜坐塵心定長吟語力微人間太多事何處夢柴扉

尋山

唐李頻

一徑入雙崖初疑有幾家行窮人不見坐久日空斜石上生靈草泉中落異花終須結茅屋向此學餐霞

游山

唐黃滔

洞門穿瀑布塵世豈能通曾有游山客來逢採藥翁異  
花尋復失幽徑躡還窮擬作今宵計風雷立滿空

春山行

唐僧貫休

重疊太古色濛濛花雨時好山行恐盡流水語相隨黑  
壤生紅朮黃猿領白兒因思石橋畔曾與道人期

山中即事

宋戴復古

巖路穿黃葉人家隱翠微籠雞為鴨抱網犬逐鶉飛竹  
好堪延客谿流欲浣衣禪扉在何許僧笠戴雲歸

山行

戴復古

度嶺休騎馬臨淵看網魚  
木根高可坐巖石細堪書  
谷鳥鳴相答山雲卷復舒  
儒衣人賣酒疑是馬相如

曉行山間

宋真山民

出門誰是伴只約瘦藤行  
一二里山徑兩三聲曉鶯亂  
峰相出沒初日乍陰晴  
僧舍在何許隔林鐘磬清

春日山中

明蔡羽

草動三江色林占萬壑晴  
籬邊春水至檐際暖雲生  
谿



犬迎船吠鄰雞上樹鳴鹿門何必去此地可躬耕

行山中

明王同軌

雨餘林氣靜山晚日光斜野店依孤樹村橋卧斷槎馬嘶遙澗水犬吠隔籬花白首鋤雲者春風自一家

五言排律

春晚從李長史游開道林故山

唐駱賓王

幽尋極幽壑春望陟春臺雲光樓斷樹靈影入仙杯古

藤依格上野徑約山隈落蕊翻風去流鶯滿樹來興闌  
荀御動歸路起浮埃

還山宅

唐楊師道

暮春還舊嶺徙倚玩年華芳草無行徑空山正落花垂  
藤掃幽石卧柳礙浮槎鳥散茅簷靜雲披澗戶斜依然  
此泉路猶是昔烟霞

冬日歸舊山

唐李白

未洗染塵纓歸來芳草平一條藤徑綠萬點雪峰晴地

冷葉先盡谷寒雲不行嫩篁侵舍密古樹倒江橫白犬  
離邨吠蒼苔上壁生穿廚孤雉過臨屋舊猿鳴木落禽  
巢在籬疎獸路成拂牀蒼鼠走到篋素魚驚洗硯脩良  
策敲松擬素貞此時重一去去合到三清

酬故人還山

唐  
宋鼎

舉棹乘春水歸山撫歲華碧潭宵見月紅樹晚開花肅  
穆輕風度依微隱徑斜危亭暗松石幽澗落雲霞思鳥  
吟高樹游魚戲淺沙安知餘興盡相望紫烟賒

七言律

送韓侍御歸山

唐張籍

聞君久欲卧雲間，為佐嫖姚未得還。  
新結茅廬招隱客，獨騎驄馬入深山。  
九靈洞口行應到，五粒松枝醉亦攀。  
明日珂聲出城去，家僮不復掃柴關。

山行

唐項斯

青旌林深亦有人，一渠流水數家分。  
山當日午回峰影，草帶泥痕過鹿羣。  
蒸茗氣從茅舍出，綵絲聲隔竹籬聞。

行逢賣藥歸來客不惜相隨入島雲

山中言事

唐方干

日與邨家事漸同燒松啜茗學鄰翁  
池塘月撼芙蓉浪窗戶涼生薜荔風  
書幌晝昏嵐氣裏巢枝夜折雪聲中  
山陰釣叟無知己窺鏡得多鬢欲空

長安月夜與友生話故山

唐趙嘏

宅邊秋水浸苔磯日日持竿去不歸  
楊柳風多潮未落蒹葭霜在雁初飛  
重嘶匹馬吟紅葉却聽疎鐘憶翠微

今夜秦城滿樓月故人相見思依依

入山

宋孔武仲

路出西林興倍長輕衫短蓋入秋陽層崖蔽日多清影  
深谷迷人有異香訪古不辭穿絕磴叅禪直為遍諸方  
此身似是遼東鶴偶逐飛雲到故鄉

山行

宋陸游

閒人日日得閒行况值今朝小雨晴水淺游魚渾可數  
山深藥草半無名臨谿旋喚冒船渡過寺初聞浴鼓聲

小醉未應風味減滿盤青杏伴朱櫻

山中

京翁卷

山中百事總相宜第一紅塵免上衣尋藥每同丹客去  
拾薪多趁牧兒歸鳴泉漱石寒蒲潔宿霧蒸泥早蕨肥  
不奈鄰峰學禪伴時時來此扣巖扉

山行

京方岳

亦愛盧仝屋數間野猿臯鶴共躋攀繞登樓見一谿月  
不出門行十里山有興自攜殘稿醉無人得似老夫閒

樵青莫掩柴扉路留與春風作往還

山行

方岳

歲晚誰同澗谷槩一牛呼犢野烟寒却如有雪蕎花白  
山未著霜楓葉丹是處豐登茅店酒老夫閒散竹皮冠  
醉歸更草郊居賦傳與詩人作畫看

山行

宋真山民

林梢初日弄陰晴露浥谿花笑欲迎澗暗只聞泉滴瀝  
山青剝見鷺分明遠峰忽轉還如繞險徑徐行亦似平



莫道詩成無與和風篁也解作吟聲

夢登高山得詩

元  
薩都拉

杖藜踏破碧崔嵬夢裏清游樂未回  
萬壑泉聲松外去數行秋色鴈邊來  
文章小杜人何在風雨重陽菊自開  
山路雲深行客倦竹雞飛上獨春臺

山居晚興

元  
尹廷高

高住青峰不計層閉門危坐絕交朋  
竹聲欲斷微聞雨却色初昏遠見燈  
宿鳥並枝閒寂寂歸雲度壑慢騰騰

鄰翁笑我生涯拙紙帳梅花絕類僧

山居

元  
丁鶴年

日日看山眼倍明更無一事可關情  
掃開積雪巖前坐領取閒雲隴上行  
不共羽人談太易嬾從衲子話無生  
劃然時發蘇門嘯遙答風聲及水聲

次韻張布政游山

明  
僧德祥

不因覽勝入松門猿鳥何曾識使君  
黃葉路從流水上青蘿牀與白雲分  
逢僧且說新裁句見寺先尋舊刻文

冰雪寒巖春到後  
樹如膏沐草如薰

五言絕句

窗裏山

唐錢起

遠岫見如近  
千重一窗裏  
坐來石上雲  
乍謂壺中起

山中即事

唐郎士元

入谷多春興  
扁舟棹碧潯  
山雲昨夜雨  
谿水曉來深

遠山

唐皇甫冉

少室盡西峰  
鳴皋隱南面  
柴門縱復關  
終日窗中見

送吉中孚校書歸楚州舊山

唐 盧綸

漁邨繞水田澹澹隔晴烟欲就林中醉先期石上眠

其二

林昏天未曙但向雲邊去暗入無路山心知有花處

其三

寥寥行異境過盡千峰影露色凝古壇泉聲落寒井

天津橋南山中各題一句

唐 李益

野坐分苔席

李益

山行遠蒨叢

韋執中

雲衣惹不破

諸葛秋

秋

色望來空

賈島

山中宿

唐白居易

獨到山中宿靜向月中行何處水邊碓夜春雲母聲

春山

唐司空圖

可是武陵谿春芳著處迷花明催曙早雲膩惹空低

前山

唐裴夷直

只謂一蒼翠不知猶數重晚來雲映處更見兩三峰

遠山

吳融

隱隱隔千里  
巍巍知幾重  
平時未能去  
夢斷一聲鐘

出山

宋 陳與義

山空樵斧響  
隔嶺有人家  
日落潭照樹  
川明風動花

入山

陳與義

出山復入山  
路隨谿水轉  
東風不惜花  
一暮都開遍

其二

都迷去時路  
策杖烟漫漫  
微雨洗春色  
諸峰生晚寒

宿山中

宋 劉克莊

就泉為碓屋累石作書龕有意耕汾曲無心起水南

山中雜詩

金元好問

石潤雲先動橋平水漸過野陰添晚重山意向秋多

其二

樹合秋聲滿却荒暮景閒虹收仍白雨雲動忽青山

郊飲醉歸

元張養浩

昨朝醉田間欲偕山為枕青山不肯前却枕白雲寢

山中偶題

元黃潛

古苔隱石色寒花明藥叢有時白澗雨終日青松風

雜興

元周權

流水數家邨青山白雲塢春晚落紅深夜寒谿上雨

游三洞金盆諸峰絕句

元葉顥

大山嚴而尊小山婉而秀往來兩山間巖扉濕吟袖

山中景

元僧英

六月山深處松風冷襲衣遙知城市裏撲面火塵飛

山中

僧英



窗前瀑布寒林外夕陽薄清風何處來撲撲松花落

送人還山

元僧善住

偶隨流水出閒趨白雲歸步石苔侵屐攀松露滴衣

六言絕句

問李二司直所居雲山

唐皇甫冉

門外水流何處天邊樹繞誰家山色東西多少朝朝幾  
度雲遮

尋張逸人山居

唐劉長卿

危石纔通鳥道空山更有人家桃源定在何處澗水浮  
來落花

七言絕句

宿石邑山中

唐韓翃

浮雲不共此山齊山靄蒼蒼望轉迷曉月暫飛千樹裏  
秋河隔在數峰西

秋山

唐張籍

秋山無雲復無風谿頭看月出深松草堂不閉石牀靜

葉間墜露聲重重

逢鄭三遊山

唐盧仝

相逢之處花茸茸  
石壁攢峰千萬重  
他日期君何處好  
寒流石上一株松

小江驛送陸侍御歸湖上山

唐陳羽

鶴唳天邊秋水空  
荻花蘆葉起西風  
今夜渡頭何處宿  
會稽山在月明中

山中贈諸暨丹丘明府

唐秦系

荷衣半破帶莓苔笑向陶潛酒甕開縱醉還須上山去  
白雲那肯下山來

山中

唐顧況

野人愛向山中宿況在葛洪丹井西庭前有箇長松樹  
夜半子規來上啼

移居深山

唐劉商

不食黃精不采薇葛苗為帶草為衣孤雲更入深山去  
人絕音書雁自飛

山中作

唐馬戴

屐齒無泥竹策輕  
莓苔滑夜難行  
獨開石室松門裏  
月照前山空水聲

入山

宋孔武仲

冠蓋成陰中路迴  
獨攜蓮社道人來  
千巖萬壑初相識  
分付晴嵐面面開

段家堤西望晚山

宋蔡襄

月下西山千萬重  
日光山氣鬱蔥籠  
蛟綃數幅須移得

惆悵如今少畫工

入山留客

蔡襄

山光物態弄春暉  
莫為輕陰便擬歸  
縱使晴明無雨過  
入林深處亦霑衣

雪消谿漲山色尤可喜口占

宋朱子

頭上瓊岡出舊青  
馬邊流水漲寒汀  
若為留得晶瑩在  
突兀長看素錦屏

登山有作次敬夫韻

朱子

晚峯雲散碧千尋  
落日衡甍霜氣深  
霽色登臨寒夜月  
行藏只此驗天心

山中

金馬天來

青林寂寂鳥關關  
畫出風烟落照間  
脫却芒鞋臨水坐  
白雲分我一邊閒

下山

元劉因

翠霞騰暈紫成堆  
收盡雲烟酒一杯  
想見浮嵐在眉宇  
人人知道看山回

山中

元黃庚

萬壑松聲撼翠微  
夜寒風露濕人衣  
山翁踏月巡幽徑  
竹裏籠開鶴未歸

日夕觀山

元許有孚

晚晴臺上看巉巖  
萬壑千峰起翠嵐  
恰似雲間招五老  
今宵有夢定江南

山中

元宋元

半嶺松聲樵客分  
一谿春草鹿成群  
採芝人入翠微去



丹竈石壇空白雲

江上看山

明胡宗仁

江上看山分外青  
更憐山畔有雲行  
連朝認熟橋西路  
孤杖無勞藉友生

御定佩文齋詠物詩選卷四十九

欽定四庫全書

御定佩文齋詠物詩選卷五十

泰山類

五言古

泰山吟

宋謝靈運

岱宗秀維嶽崔嵬刺雲天  
岵嶸既峻巖觸石輒芊綿  
登封瘞崇壇降禪藏肅然  
石閭何晻藹明堂祕靈篇

遊泰山

唐李白

四月上泰山石平御道開六龍過萬壑澗谷隨縈迴馬  
跡遠碧峰於今滿青苔飛流瀉絕巘水急松聲哀北眺  
崑崙奇傾崖向東摧洞門閉石扇地底興雲雷登高望  
蓬瀛想像金銀臺天門一長嘯萬里清風來玉女四五  
人飄飄下九垓含笑引素手貽我流霞杯稽首再拜之  
自愧非仙才曠然小宇宙遺世何悠哉

其二

清曉騎白鹿直上天門山山際逢羽人方瞳好容顏捫

蘿欲就語却掩青雲關遺我鳥跡書飄然落巖間其字  
乃上古讀之了不閒感此三歎息從師方未還

其三

平明登日觀舉手開雲關精神四飛揚如出天地間黃  
河從西來窈窕入遠山憑崖覽八極目盡長空閒偶然  
值青童綠鬢雙雲鬟笑我晚學仙蹉跎凋朱顏躊躇忽  
不見浩蕩難追攀

其四

清齋三十日裂素寫道經吟誦有所得衆神衛我形雲  
行信長風颯若羽翼生攀崖上日觀伏檻窺東溟海色  
動遠山天雞已先鳴銀臺出倒景白浪翻長鯨安得不  
死藥高飛向蓬瀛

其五

日觀東北傾兩崖夾雙石海水落眼前天光遙空碧千  
峰爭攢聚萬壑絕凌歷緬彼鶴上仙去無雲中跡長松  
入霄漢遠望不盈尺山花異人間五月雪中白終當遇

安期於此鍊玉液

其六

朝飲王母池暝投天門關獨抱綠綺琴夜行青山間  
明月露白夜靜松風歇仙人遊碧峰處處笙歌發寂聽  
娛清輝玉真連翠微想像鸞鳳舞飄飄龍虎衣捫天摘  
匏瓜恍惚不憶歸舉手弄清淺誤攀織女機明晨坐相  
失但見五雲飛

送范山人歸泰山

李白

魯客抱白鶴別余往泰山初行若片雪杳在青崖間高  
高至天門海日近可攀雲生望不及此去何時還

望嶽

唐杜甫

岱宗夫如何齊魯青未了造化鍾神秀陰陽割昏曉盪  
胸生層雲決眇入歸鳥會當凌絕頂一覽衆山小

登嶽

明王守仁

曉登泰山道行行入烟霏陽光散巖壑秋容淡相輝雲  
梯挂青壁仰見蛛絲微長風吹海色飄颻送天衣峰頂

動笙樂青童兩相依振衣將往從凌雲忽高飛揮手若  
相待丹霞閃餘暉凡軀無健羽悵望不能歸

望嶽

明  
廖道南

岱宗高龍從羣峰凌紫穹日觀影扶桑月嶂烟朦朧飛  
泉走其下宛若雙白龍上有玉女池銀河瀉長虹玉女  
散天花萬朶青芙蓉仙人王子喬絳節朝上宮遺我金  
檢書期我遥相從我欲從之游雲路險且重何當謝塵  
鞅晞髮咸池東



七言古

題李白泰山觀日出圖

元段輔

岱宗鬱鬱天下雄  
謫仙落落人中龍  
茲山茲人乃相從  
氣奪真宰愁豐隆  
玉堂一任雲霧封  
長嘯飛渡秦皇松  
夜呼日出滄海東  
再為斯世開鴻濛  
鈞天帝居深九重  
醉舞蹈碎青芙蓉  
天孫玉女為斂容  
却視五嶽秋毫同  
長鯨一去不復逢  
乾坤萬里號秋蟲  
當年咳唾留絕峯  
至今樹石生香風  
我欲追之杳無蹤  
不意邂逅會此中

屋梁落月依然空

登嶽

元  
李 蘭

三峰突兀與天齊  
天門未到勞攀躋  
層層石磴出林杪  
縈迴百折青雲梯  
盤石暫憇舒清眺  
澗壑風來號萬竅  
水聲俄在樹梢頭  
疑有於菟天外嘯  
向曉纔登日觀峰  
手披雲霧開鴻濛  
火輪欲上海波赤  
金霞翻動蒼龍宮  
黃河一線幾千里  
吳越山川真地底  
為數齊州九點青  
更將伏檻窺東溟  
李白不過安期生  
安得羽翼飛蓬瀛

五言律

過泰山偶賦

明 汪廣洋

七十二神州淋漓紫氣浮  
天低衆山小星拱一峰秋  
雲翳成龍虎嵐光薄斗牛  
岱宗與恒嶽引領日東頭

登嶽

明 喬宇

百靈朝拱處空籟聽琅璈  
地據中原勝天臨下界高  
雲山雙老眼天地一秋毫  
欲訪蓬瀛去何從借六鼇

登嶽

明 王廷相

五嶽俱神峻，崑崙泰岱偏。  
半巖回駿馬，絕頂俯雲烟。  
一覽小天下，三更見日躔。  
蓬萊疑只尺，直恐礙飛仙。

秋暮登岱

明 查約

龍峪危峰逼天門，古殿開月華。  
秋氣爽日觀，海潮迴地。  
向皇都迴山迎，曲阜來登臨。  
何限意極目，鳳凰臺。

登嶽

明 陳沂

一入登封路，乾坤自此分。  
諸峯會元氣，亂石散星文。  
仰面攀青磴，回頭看白雲。  
飛梁架窮壑，鳴溜四山聞。

七言律

登岱

宋查道

凌空疊嶂絕凡埃，青帝高居絳節開。  
捧出海天紅日近，迂將蓬島碧霞來。  
石間閃爍迎陽洞，玉簡光華封禪臺。  
一自祥符禋祀後，太平頂上最崔嵬。

登泰山

元張養浩

風雲一舉到天關，快意平生有此觀。  
萬古齊州烟九點，五更滄海日三竿。  
向來井處方知隘，今後巢居亦覺寬。

笑拍洪崖詠新句滿空笙鶴下高寒

登岱

明 宗 濂

崑崙泰嶽挂蒼穹萬壑千巖一徑通  
象緯平臨青帝觀雲光長繞碧霞宮  
凌晨雲漫天涯白子夜晴搖海日紅  
玉露金莖應咫尺舉頭霄漢思偏雄

登岱

明 王 與

齊魯名山仰岱宗峻嶒萬仞玉芙蓉  
月明海曠連三島雲淨天空插數峰  
白石謾留名士篆蒼松何用大夫封

我來不盡登臨興更上丹崖第一重

季秋望後一日同僚友登岱

明查煥

泰岱高臨萬里看三齊秋色更漫漫振衣龍峪青雲濕  
倚劒天門白日寒東帶黃河連海岸北來紫氣繞長安  
自憐突兀平生志恍惚乘風跨彩鸞

登嶽

明邊貢

岱宗山秀百靈屯壁立烟霄萬古存幽府化機盤地軸  
上清真氣接天門霞標日觀青松麗春透龍池碧水溫

薄暮振衣峰頂石蓬萊東眺海雲昏

登嶽

明 趙鶴

一上遙岑萬丈蒼天風應為襲衣裳雞鳴往往看東日  
人語時時到下方雲暗鐘聲連海樹春浮花氣入山堂  
四時未歇登臨興翻說巖禽喚客忙

登岱

明 查秉彝

巖巖高梯紫冥開青帝星辰入望迴芳躅獨標宣聖楔  
瑤玉空秘漢封臺天連北極千山拱雲擁黃河一線來



最是生平葵藿志夜深日觀倚徘徊

懷泰山

明  
李攀龍

域內名山有岱宗側身東望一相從  
河流曉挂天門樹海色秋高日觀峰  
金篋何人探漢策白雲千載護秦封  
向來信宿藤蘿外杖底西風萬壑鐘

七言絕句

日觀峰

宋  
范致中

岱岳東南第一觀青天高聳碧巔岼  
若教飛上峰頭立

應見陽烏浴未乾

日觀峰

金蕭貢

半夜東風攪鄧林  
三山銀闕杳沉沉  
洪波萬里兼天湧  
一點金烏出海心

御定佩文齋詠物詩選卷五十

欽定四庫全書

御定佩文齋詠物詩選卷五十一

華山類

五言古

行經太華

隋孔德紹

紛吾世網暇靈岳展幽尋寥廓風塵遠杳冥川谷深山  
昏五里霧日落二華陰踈峰起蓮葉危塞隱桃林何必  
東都外此處可抽簪

華嶽

唐王維

西嶽出浮雲積翠在太清連天疑黛色百里遙青冥白  
日為之寒森沈華陰城昔聞乾坤閉造化生巨靈右足  
踏方山左手推削成天地忽開拆大河注東溟遂為西  
峙嶽雄雄鎮秦京大君包覆載至德被羣生上帝佇昭  
告金天思奉迎神祇望幸久何獨禪云亭

過華陰

唐王昌齡

雲起太華山雲山互明滅東風始含景了了見松雪羈

人感幽棲宵映轉奇絕欣然忘所疲永望吟不輟信宿  
百餘里出關玩新月何意昨來心遇物遂遷別人生屢  
如此何以肆愉悅

望太華贈盧司倉

唐陶翰

行吏到西華乃觀三峰壯削成元氣中傑出天漢上如  
有飛動色不知青冥狀巨靈安在哉厥跡猶可望方此  
顧行旅末由飭仙裝蔥朧記星壇明滅數雲障良友垂  
真契宿心所徽尚敢投歸山吟霞徑一相訪

關門望華山

唐劉長卿

客路瞻太華三峰高際天夏雲亘百里合沓遙相連雷  
雨飛半腹太陽在其巔翠微關上近瀑布林梢懸愛此  
衆容秀能令西望偏徘徊忘暝色決瀉成陰烟曾是朝  
百靈亦聞會羣仙瓊漿豈易挹毛女非空傳髣髴仍佇  
想幽奇如眼前金天有清廟松柏隱蒼然

華山西岡遊贈隱元叟

唐顧況

羣峯鬱初霽潑黛若鬟沐天風鼓嗒呀搖撼千灌木木

葉微墮黃石泉淨傳綠危磴蘿薜牽迴步入幽谷我心  
寄青霞世事慙蒼鹿遂令巢許輩於焉謝塵俗想是悠  
悠雲可契去留躅

華山歌

唐  
劉禹錫

洪爐作高山元氣鼓其橐俄然神功就峻拔在寥廓靈  
跡露指爪殺氣見稜角凡木不敢生神仙聿來託天資  
帝王宅以我為關鑰能令下國人不見換神骨高山固  
無限如此方為嶽丈夫無特達雖貴猶碌碌



五言律

觀華嶽

唐祖詠

西入秦關口南瞻驛路連  
彩雲生闕下松柏到祠邊  
作鎮當官道雄都俯大川  
危峰徑上處彷彿有神仙

送田卓入華山

唐賈島

幽深足暮蟬驚覺石床眠  
瀑布五千仞草堂瀑布邊  
壇松涓滴露獄月沈寥天  
鶴過君須看上頭應有仙

馬戴居華山因寄

賈島

玉女洗頭盆孤高不可言瀑流蓮嶽頂河注華山根絕  
雀林藏鶻無人境有猿秋蟾繞過雨石上古松門

華山

唐張喬

誰將倚天劒削出倚天峰衆水背流急他山相向重樹  
黏青靄合崖夾白雲濃一夜盆傾雨前湫起毒龍

華山上方

唐裴說

獨上上方上立高聊稱心氣衝雲易黑影落縣多陰有  
雪草不萎無風松自吟會當求大藥他日復追尋

五言排律

途經華嶽

唐明皇

飭駕去京邑鳴鑾指洛川  
循途經太華迴蹕蹕周旋  
翠嶺留斜影懸巖冒夕烟  
四方皆石壁五位配金天  
彷彿看高掌依稀聽子先  
終當銘歲月從此記靈仙

奉和聖製途經華嶽應制

唐張說

西嶽鎮皇京中峰入太清  
玉鑾重嶺應緹騎薄雲迎  
霽日懸高掌寒空映削成  
軒游會神處漢幸望仙情  
舊廟

青林古新碑綠字生羣臣願封岱還駕勒鴻名

華山

唐鄭谷

峭壁聳巍巍晴嵐染近畿孤高不可狀圖寫盡應非絕  
頂神仙會半空鸞鶴歸雲臺分遠靄樹谷隱斜暉墜石  
連村響狂雷發廟威氣中寒渭濶影外白樓微雲對蓮  
花落泉橫露掌飛乳懸危磴滑樵徹上方稀澹泊生真  
趣逍遙息世機野花明澗路春蘚澀松圓遠洞時聞磬  
羣僧晝掩扉他年洗塵骨香火願相依

華山

唐張喬

青蒼河一隅氣狀杳難圖卓傑三峰出高竒四嶽無力  
疑擎上界勢獨壓中區衆水東西走羣山遠近趨天迴  
諸宿照地聳百靈扶石壁烟霞麗龍潭雨雹瀰澄凝臨  
甸服險固束神都淺覺川原異深應日月殊鶴歸青靄  
合仙去白雲孤瀑溜斜飛凍松長倒挂枯每來探洞穴  
不擬返江湖儻有芝田種巖間老一夫

七言律

行經華陰

唐崔顥

岵嶢太華俯咸京，天外三峰削不成。  
武帝祠前雲欲散，仙人掌上雨初晴。  
河山北枕秦關險，驛樹西連漢畹平。  
借問路傍名利客，無如此處學長生。

望嶽

唐杜甫

西嶽峻嶒聳處尊，諸峰羅立似兒孫。  
安得仙人九節杖，拄到玉女洗头盆。  
車箱入谷無歸路，箭括通天有一門。  
稍待秋風涼冷後，高尋白帝問真源。

華山

唐李洞

碧山長凍地長秋日夕泉源聒華州萬戶烟侵關令宅  
四時雲在使君樓風驅雷電臨河震鶴引神仙出月遊  
峰頂高眠靈藥熟自無霜雪入人頭

華山

元張翔

三峰雲滿紫芝田十丈花開玉井蓮白帝真源深固地  
金精灝氣遠浮天一杯滄海波搖月九點齊州樹帶烟  
千首新詩百壺酒醉來騎鶴訪羣仙

華山

明  
朱志堞

萬仞巍峩出自然巨靈手劈是何年  
三峰秀出雲霄外一掌高擎日月邊  
李白問天登絕頂陳搏傲世隱危巔  
何當穩步長梯上摘取峰頭玉井蓮

華山石關

明  
王履

裂石為關似洞門天慳神秀此相分  
不曾臨澗先眠石未暇登峰且看雲  
鳥哢只從中界斷松聲專許上方聞  
誰人更似周徵士不怕鍾山孔氏文



華山和唐崔顥韻

明楊榮

魏峩西嶽峙咸京天削芙蓉畫不成勢逼雲霄撐日月  
氣通川澤候陰晴秦關北去天垂險漢時西臨砥柱平  
回首武皇祠下路行人過盡暮烟生

登華至青柯坪紀勝

明陳于陞

偶從靈岳訪真源秀挿青冥勢自尊潭底五龍盤地軸  
崖端雙鷲劃天門攀蘿欲借金仙掌散髮宜窺玉女盆  
自有芙蓉三尺在蓮花十丈豈須論

其二

望中烟朶氣佳哉疑是三神海上來  
坼峽靈雲高士卧  
峭峰削壁巨靈開銀河倒瀉晴飛雨  
石鼓高懸晝殷雷  
願結茅亭依玉井不愁蕊笈闕丹臺

其三

兩度仙坪迴俗駕烟霞絕巘興難忘  
欲憑芒屨青藜杖  
更裹黃精白石糧掌上芙蓉囊五露  
池頭沆瀣挹三漿  
還應坐嘯中峰頂手摘明星瞰太荒

其四

鐵索金梯苦未攀，半山臺榭亦開顏。  
秦城北漠寒烟外，漢闕南山夕照間。  
雲棧千盤平若薺，龍門一曲細如環。  
奇遊恨不通仙史，紫氣空留百二關。

五言絕句

華山

宋寇準

只有天在上，更無山與齊。  
舉頭紅日近，回首白雲低。

華山

金王特起

三峰盤地軸一水落天紳造化無遺巧丹青總失真

登華

明葉祿

華嶽仙人掌擎天日月高乳山叢雜處渾不露纖毫

七言絕句

和錢華州題少華清光絕句

唐白居易

高情雅韻三峰守主領清光管白雲自笑亦曾為刺史  
蘇州肥膩不如君

雲閒見華山

唐李頻

夾道人家水竹間馬頭山色畫應難天公故故開雲幕  
乞與蓮峰仔細看

望毛女峰

唐陸暢

我種東峰千葉蓮此峯毛女始求仙今朝暗算當時事  
已是人間七萬年

太華

明劉基

石屏御道鳥飛迴漢帝親封玉檢來灝氣滿空清似水  
芙蓉直上九天開

華山雜興

明  
孫應鰲

玉女窗開眼界明  
仙童肅隊奏鸞笙  
海雲初散蓬萊色  
人在蒼龍背上行

其二

拂枕隱眠延露石  
開襟長嘯蔚藍天  
畫驅虎豹耕南畝  
種出黃精養壽年

御定佩文齋詠物詩選卷五十一

欽定四庫全書

御定佩文齋詠物詩選卷五十二

衡山類

五言古

衡山

晉庾闡

北眺衡山首南睨五嶺末  
寂坐挹虛恬運目情四豁  
翔虬凌九霄陸鱗困濡沫  
未體江湖悠安識南溟濶

巖下見一老翁四五少年贊

唐謝靈運



衡山採藥人路迷糧亦絕過息巖下坐正見相對說一  
老四五少仙隱不可別其書非世教其人必賢哲

江上送女道士褚三清遊南嶽

唐李白

吳江女道士頭戴蓮花巾霓衣不濕雨特異陽臺神足  
下遠遊履凌波生素塵倦尋向南嶽應見魏夫人

望衡山

唐劉禹錫

東南已蓋卑維嶽資柱石前當祝融居上拂朱鳥翮青

冥結精氣磅礴宣地脉還聞膚寸陰能致彌天澤

望南嶽

明楊基

我從匡廬來但覺諸山低嵯峨望衡岳雲霄與之齊下有赤蛇蟄上有朱雀棲仰瞻祝融拔俯揖紫蓋迷五嶺皆培塿三江為涔蹄巍然南服尊嵩霍相提攜封秩崇君稱諸神咸朝隣丹書篆寶冊萬古封金泥百王重祀典赤繅藉玉圭自非精靈通牲帛勞焚費余方向遠道無由陟層梯蒼蒼烟霞中喔喔聞天雞緬思昌黎伯恭

集賢堂  
卷五十二  
默開雲霓靈貺自昭格誠敬良可稽斯人向千載感念  
徒含悽

七言古

附長短句

與諸公送陳郎將歸衡陽

唐李白

衡山蒼蒼入紫冥下看南極老人星迴飈吹散五峰雪  
往往飛花落洞庭氣清嶽秀有如此郎將一家拖金紫  
門前食客亂浮雲世人皆比孟嘗君江上送行無白璧  
臨歧惆悵若為分

登祝融峰贈星上人

元揭傒斯

洞庭南桂嶺北衡山連延瀟湘黑中有祝融如髻鬟嵯峨七十二峰間祝融不自知千山萬山如廻環廻環面芙蓉裏儼如天仙朝紫皇千官百辟遙相望半夜每瞻東海日六月常飛滿樹霜龍拏鳳攬熊虎擲雲生霧滅何時極我來正值太平時況有山僧似疇昔憑高一覽四海空草間培塿安足雄盤盤羅漢臺翕翕炎帝宮復恐九天上視我如井中朔風日夜相騰颺谷老崖堅

松柏禿古來鐵瓦盡飄揚山上至今猶板屋山僧勸我  
歌我歌徒自傷天下五岳嵩中央此山與我俱南疆我  
今三十始一見北望中原天更長

五言律

遊南嶽

唐張喬

入巖仙境清行盡復重行若得閒無事長來寄此生澗  
松寒易老籠燭晚生明一宿泉聲裏思鄉夢不成

七言律

送瑩上人遊衡嶽

宋僧惠洪

紫蓋峰頭樓閣生，朱靈洞口水雲晴。  
盤空路作驚蛇去，落日人如凍蟻行。  
重郭老師今健否，藏年珍本但聞名。  
定應自掃巖邊石，時發披雲嘯月聲。

遊南嶽

明蔡汝楠

曉晴已到開雲處，晝靜疑聞鼓瑟歌。  
湘水英靈終繚紉，潮陽道路此經過。  
乍憐出郭塵喧斷，翻為登山感慨多。  
更道秋風散南極，葳蕤朱鳳欲如何。

七言絕句

衡嶽道中

京陳與義

客子山行不覺風  
龍吟虎嘯滿山松  
綸巾一幅無人識  
勝業門前聽午鐘

迴衡山縣望南嶽

元陳孚

雨洗松陰綠未乾  
今朝山下倚闌干  
一天露重月華濕  
七十二峰生翠寒

衡岳

明傅汝舟

扶桑枝上交王父  
七鳳車前謁羽君  
天際玉笙誰得弄  
時時吹起掌中雲



御定佩文齋詠物詩選卷五十二

欽定四庫全書

御定佩文齋詠物詩選卷五十三

恒山類

四言古

恒山

晉傅咸

奕奕恒山作鎮冀方伊趙建國在嶽之陽

五言古

北嶽

唐賈島

天地有五嶽恒嶽居其北巖巒疊萬重詭怪浩難測人  
來不敢入祠宇白日黑有時起霖雨一灑天地德神今  
安在哉永康我王國

五言排律

北嶽

明  
馬汝驥

代郡高誰闢恒山鬱自盤頂浮天地濶傍掩日星殘形  
勢并門扼威靈奠宅安省方元帝始分野紫垣端錦繡  
虛無出銀鈎縹緲看寶符傳七聖玉檢奉千官俎豆行

冬殿旌旗駐曉鑒觀碑垂歲月窟石鎮林巒百里烟霞  
秀三時雨雹寒穴風生虎吼巖瀑注龍蟠鐘乳猶懸穗  
金芝即捧梁薜蘿翻翠壁松柏護瑤壇雲步名仙會脂  
圖大隱歡障開峰繞碧社入竈還丹拄杖思黃鵠飛車  
問赤鸞真源何窈窕不獲挂纓冠

御定佩文齋詠物詩選卷五十三

欽定四庫全書

御定佩文齋詠物詩選卷五十四

嵩山類

五言古

送楊山人歸嵩山

唐  
李白

我有萬古宅嵩陽  
玉女峰長留一片月  
挂在東谿松  
爾去掇仙草  
菖蒲花紫茸  
歲晚或相訪  
青天騎白龍

五言律

歸嵩山作

唐王維

清川帶長薄，車馬去閒閒。  
流水如有意，暮禽相與還。  
荒城臨古渡，落日滿秋山。  
迢遞嵩高下，歸來且閉關。

七言律

嵩山石淙侍宴應制

唐沈佺期

金輿旦下綠雲衢，彩殿晴臨碧澗隅。  
谿水泠泠逐行漏，山烟片片引香爐。  
仙人六膳調神鼎，玉女三漿捧帝壺。  
自惜汾陽紆道駕，無如太室覽真圖。

三陽宮石淙侍宴應制

唐宋之問

離宮秘苑勝瀛洲，別有仙人洞壑幽。  
巖邊樹色含風冷，石上泉聲帶雨秋。  
鳥向歌筵來度曲，雲依帳殿結為樓。  
微臣昔忝方明御，今日還陪八駿遊。

五言絕句

嵩山夜還

唐宋之問

家住嵩山下，好采舊山薇。  
自省遊泉石，何曾不夜歸。

贈柳喜自號嵩山老

唐僧皎然



一見嵩山老吾生恨太遲問君年幾許曾出上皇時

遊嵩山

元楊奐

輟轅坂

盤盤十二曲石嶺瘦崢嶸脚底有平地何人險處行

少室

方若植鬼冠森若削寒玉明月夜中遊誰家借黃鵠

盧巖

避名名自在身瘠道還腴未到千年後空巖已姓盧

北渡水

幾時落東谿曲折卧天漢語似登山人可飲不可盥

七言絕句

送李秀才遊嵩山

唐顧况

嵩山石壁挂飛流無限神仙在上頭采得新詩題石壁  
老人惆悵不同遊

送友人遊嵩山

唐陳羽

嵩山歸路遠天壇雲影松聲滿谷寒君見九龍壇上月

莫辭清夜水中看

送聞上人遊嵩山

唐歐陽詹

二室峰峰昔願遊從雲從鶴思悠悠  
丹梯石磴君先去  
為上青冥最上頭

御定佩文齋詠物詩選卷五十四

欽定四庫全書

御定佩文齋詠物詩選卷五十五

西山類

五言古

遊玉泉山呈袁伯長學士

元 朱德潤

宛平佳山水歷歷蟠心胸忽登羣峰頂下瞰青蓮宮長  
松騰翠蛟古磴妥垂虹雲開扶輿氣翕忽如仙翁我來  
方醉後遊覽徹九重長嘯出林杪振袂揚天風願同安

期生攜手凌昊穹

暮登香山

明 吳 擴

石門亘西天幽花夾山路歸鳥競喧呼夕陽隱芳樹登  
登青崖端偶與羣公遇散坐雲壑間會茲靜中趣纖月  
何娟娟清風灑襟素

七言古

遊香山

元 張養浩

山行彌日山益奇亂峰挾翠如吾隨遊人聯蟻度林杪

細路一線雲間垂  
茫茫四顧動心魄  
嵐光蕩秀浮雙眉  
路迴寶剎忽風墮  
大鵬九萬離天池  
林間媚景翳復吐  
欲見不見神護持  
松藏雷雨太陰黑  
泉迸巖藪銀虹馳  
我來青帝已迴馭  
太古殘雪猶離離  
一聲啼鴉百花落  
兩崖紅雨春林滴  
笑驅虎豹坐盤礴  
悠悠萬古歸支頤  
須臾興盡下寥廓  
長風又送雲邊詩  
蓬萊兜率杳何處  
無乃造物移于斯  
往年夢裏記曾到  
先聲已為猿鶴知  
惜無奇語勒丹壁  
坐令清賞成絕癡  
斜陽忽將暝色至

山靈應怪歸鞍遲人間勝事忌多取毋使樂極還生悲

五言律

同黎秘書游西山經玉泉山池亭望西湖

明  
歐大任

並馬今朝路西行訪石經山泉浮鉢綠湖草映袍青積  
玉迷春磧飛花入暮亭十年江上客烟雨憶揚舲

七言律

西山

元  
馬祖常

鳳城西去玉泉頭  
楊柳堤長馬上遊  
六月薰風吹別殿  
半天飛雨灑重樓  
山浮樹蓋連雲動  
露滴荷盤並水流  
艤岸龍舟能北望  
翠華來日正清秋

西山

明  
李東陽

日日車塵馬足間  
夢魂連夜到西山  
近郊地在翻成遠  
出郭身來始是閒  
雲裏盪胸看縹緲  
谿邊洗耳聽潺湲  
秋風忽散城頭雨  
先為遊人一解顏

其二



望盡孤雲入杳冥，翠微深處一茅亭。  
高臺地迴秋先至，古寺僧閒晝亦扃。  
詩思更隨流水遠，醉魂還為碧山醒。  
憑虛試徹凌雲調，應有遊人下界聽。

玉泉山

李東陽

日照山山紫翠生，雨餘秋色更分明。  
蜃樓出霧東浮海，雉堞連雲北繞城。  
舊識郵亭猶問路，漸多僧寺不知名。  
十年幾度登臨約，未盡平生吏隱情。

西山道中

明  
馬文叔

曉來聯騎踏晴沙風景蒼蒼一望賒幾處白雲前代寺  
數卬流水野人家鶯啼別墅春猶在馬到西山日未斜  
回首不知歸路遠九重宮殿隔烟霞

七言絕句

宿西山

明謝榛

深夜無眠風露清天移北斗坐間橫幽人不作紅塵夢  
月照山空鶴一聲

御定佩文齋詠物詩選卷五十五

欽定四庫全書

御定佩文齋詠物詩選卷五十六

盤山類

五言古

盤山

明  
王嘉謨

折坂殿懸厓悠然縱鞍韉綿綿谷口雲飄墮白如練峰巒忽相冒奇石還驚眩大者數十尋小或等冠弁峰巔有紺宇歷歷皆可見永懷僧栖樂倍覺塵情倦稀逢采

芝侶獨立幾回眄

盤山雙峰寺

王嘉謨

遠眺翠微近雲木澹清姿石華浮半空飛泉激流澌其  
陽饒怪石小大紛參差萬嶺鬱相錯孤雲停不移中峰  
構翠龕一一能仁祠山僧衣蘿薜雜以松蘚皮導我磨  
蒼崖覽古生遐思

七言古

登盤山絕頂謁黃龍祠

明謝榛

蘭北來遊第一山上連七十二禪關人行巨壑泉聲裏  
馬度層崖雲氣間石徑蕭蕭風吹冷萬折千迴臨絕頂  
鐘響時傳下界遙鳥飛不到諸天迴無勞漢使泛槎心  
揮手銀河能幾尋歷歷邊城紛蟻垤明明滄海一牛涔  
老僧笑指烟霞外此意沈冥誰與會風生平地本無因  
雲點太清猶是礙懷古踟躕空石堂黃龍高舉杳茫茫  
珠林不見菩提影寶塔長含舍利光壁塵拂去獨留賦  
下嶺回看迷曉霧放浪人間那復來月明夢繞盤山路

五言排律

登盤山絕頂

明 蕭應鳳

聞說盤山勝，當年是鬼工。  
移將多怪石，疊作一崆峒。  
寺傍雲根見，人從鳥道通。  
烟消關氣紫，日出海波紅。  
萬壑爭飛瀑，雙峰半倚空。  
憑虛凌絕頂，極目思無窮。

七言律

遊盤山

明 王衡

塞北山河百二重，太行雲氣入提封。  
泉爭亂壑時縈馬。

谷響虛巖半是松  
紫邏烟花當九月  
青天雷雨入雙龍  
朝來策杖中盤寺  
指點經行第幾峰

其二

孤筇短笠乍低昂  
翠壁丹楓引興長  
片石倒懸流水路  
斷崖剛掩薜蘿房  
諸天影裏沈西界  
斜月林中見上方  
繞盡寒空不知路  
冥冥鐘磬遠相將

七言絕句


望盤山

明

高承埏



中盤雲氣下盤生紫蓋峰高晚獨晴願得他時解塵組  
白松樹底飯黃精



御定佩文齋詠物詩選卷五十六

欽定四庫全書

集部

御定佩文齋詠物詩選卷

五十七至  
六十二

詳校官侍郎<sub>臣</sub>李封

主事銜<sub>臣</sub>徐以坤覆勘

總校官檢討<sub>臣</sub>何思鈞

校對官中書<sub>臣</sub>王璣

謄錄監生<sub>臣</sub>藍表璐

欽定四庫全書

御定佩文齋詠物詩選卷五十七

鍾山類

五言古

遊鍾山應西陽王教

梁沈約

靈山紀地德地險資嶽靈終南表秦觀少室邇王城翠  
鳳翔淮海襟帶遠神垓北阜何其峻林薄杳蔥菁

其二

發地多奇嶺干雲非一狀合沓共隱天參差互相望鬱  
律構丹巘峻增起青嶂勢隨九疑高氣與三山壯

其三

即事既多美臨眺殊復奇南瞻儲胥觀西望昆明池山  
中咸可悅賞逐四時移春光發隴首秋風生桂枝

其四

多值息心侶結架山之足八解鳴澗流四禪隱巖曲窈  
冥終不見蕭條無可欲所願從之遊寸心於此足

其五

君王挺逸趣羽旆臨崇基  
白雲隨玉趾青霞雜桂旗  
淹留訪五藥顧步佇三芝  
於焉仰鑣駕歲暮以為期

登鍾山讌集望西靜壇

梁吳均

客思何以緩春郊滿初律  
高車陸離至駿騎差池出  
寶椀泛蓮花珍杯食竹實  
才勝商山四丈高竹林七  
復望子喬壇金繩蘊綠帙  
風雲生屋宇芝英被仙室  
方隨鳳皇去悠然駕白日

登鍾山下峰望

梁虞騫

冠者五六人攜手巖之際散意百仞端極目千里睇疊  
岫乍昏明浮雲時卷閉遙看野樹短遠望樵人細

鍾山

明太祖

暑往鍾山阿巖幽清興多薰風自南發森松鳴絃歌黑  
猿嘯白日丹鳳巢柯柯靈芝秀深谷祥雲盛嵯峨樹隙  
觀天碧天清似綠荷迴聞樵採木曲澗沿珠螺鳥樂山  
深邃予歡顏亦和野人逢問處樂道正婆娑

鍾山賡吳沈韻

太祖

嵯峨倚空碧環山皆拱伏遙岑如劒戟過洞非茅屋青  
松秀紫崖白日生幽谷巖畔毓靈芝峰頂森神木時時  
風雨生日日山林沐和鳴盡啼鶯善舉皆飛鵠山中道  
者禪隴頭童子牧試問幾經年答云常辟穀

七言古

遊鍾山

宋蘇轍

江南四月如三伏北望鍾山萬松碧杖藜試上寶公龕

衆壑秋聲起相襲青峰迴抱石城小白練前橫大江直  
石梯南下俯城闔松徑東蟠轉山谷喬林無風聲如雨  
時見遊僧石上息行窮碧澗一菴巖坐弄清泉八功德  
歸尋晚路衆山底因卧定林依石壁朝遊不知澗谷遠  
暮歸但覺穿雙屐老僧一身泉上住十年掃盡人間迹  
客到惟燒柏子香晨飢坐待山前粥丈夫濟時誠妄語  
白首居山本良策茹蔬飯糗何足道純灰洗心聊自滌  
立身處世多愆尤愧爾山僧少憂責



五言律

秋日鍾山曉行

元薩都拉

樓閣籠雲氣，蒼茫第幾峰。  
長風萬松雨，落月半山鐘。  
石磴盤空險，僧廊落葉重。  
吾皇曾駐蹕，千古說蟠龍。

五言排律

同王勝之遊蔣山

宋蘇軾

到郡席不煖，居民空惘然。  
好山無十里，遺恨恐他年。  
欲歛南朝寺，同登北郭船。  
朱門收畫戟，紺宇出青蓮。  
夾岸

蒼髯古迎人翠麓偏龍腰蟠故國鳥爪寄層巔竹杪飛  
華屋松根泣細泉峰多巧障日江遠欲浮天略約橫秋  
水浮圖插暮烟歸來踏人影雲細月娟娟

七言律

春日陪駕幸蔣山應制

明林鴻

鍾山月曉樹蒼蒼鳳輦乘春到上方馴鳥不隨天仗散  
曇花時落御衣香珠林霽雪明山殿玉澗飛泉近苑牆  
自愧才非枚乘匹也陪巡幸沐恩光

七言絕句

鍾山即事

宋 王安石

澗水無聲繞竹流  
竹西花草弄春柔  
茅簷相對坐終日  
一鳥不鳴山更幽

遊鍾山

王安石

兩山松櫟暗朱藤  
一水中間勝武陵  
午梵隔雲知有寺  
夕陽歸去不逢僧

遊鍾山

明 太祖

鍾山陽谷梵王家帝釋臺前優鉢花遊戲但聞師子吼  
比丘身衣錦袈裟

御定佩文齋詠物詩選卷五十七